


Die AGF bräsendiert:



Hallo Ehr liewe Getreue vumm Flomerschummer Gebabbelheft:
Heit gibt ´s zwää Ausgaawe vunn unserm Heftel uff ään Schlag - nämlich die zwanzigschd unn gleichzeitisch ah die ledscht.

Ja, Ehr habt rischdisch geläase, dass isses leschde Mool, dass merr dess beliebte "Flomerschummer Gebabbel" rausbringen.

Warum?

Dess iss ganz äfach erglärt: Lääser gibt ´s genug - awwer Schreiwere nit !!!

Jedesmool war ´s schwierischer, so e Helftel voll zu grigge. Iwweraal häämer rungfroogt, ob nit jemand irgendwas hott, dass merr im "Gebabbel" ferr die Ewischkeit feschtalder käänten. Die Resonanz war meischdens schwach, falls merr "garnix" so bezeichne will.

Die Schdamm-Autore sinn mit de Zeit immer wennischer worre unn ferr die meischde junge Leit iss Pälzisch e Fremdschbrooch - die wollen heit liewer im Indernet mit de ganze Welt "twittere" unn do iss pälzisch nit ogsaat. So werdd halt unser schäänie Schbrooch so langsam verloore gehe - unn dess war jo vor 16 Johr schunn de Grund, warum isch dess Heft erfenne hab.

´s duud merr arg lääd, dasses nimmie weidergeht - isch hab ´s immer gäärn zureschtgemacht, obwohl ´s als viel Ärwett unn Uffregung war, bis e neijie Ausgab unner de Leit war.

Jetzt kummt ´s halt so wie ´s kumme muss -

ämool iss mit Allem Schluss.

Meer sinn froh unn schdolz, dass merr drotzdem 20 Ausgaawe uff die Bää gschdellt hänn unn wer Indresse hott, kann ´se im Internet all ogugge unn runnerlaade:

www.flomersheim.de - unner AGF - odder bei

www.rupp-ft.de - unner "Flomerschummer Gebabbel"

... unn jetzt winsch isch noch e bissel Frääd middem ledschde Heft
Walter Rupp



Grüß Gott, hallo und ach wie schee, dass ich eich heit all widder seh,
im Flomerschummer Kerwezelt, vom Tennisclub hier aufgestellt.
Es ist fast wie in jedem Jahr, volles Zelt und alles da.
Jeder weiß, ob groß ob klein, Kerwe iss in Flomersheim.
Und jeder, der was uff sich hält, sitzt heute hier im Kerwezelt.
So kann ich hier aus dieser Höh', unsere Miß Strohhut seh',
mein Gott wär hätte das gedacht, was ist Nina Rein für eine Pracht.

Ich sehe von hier oben heit, große und auch gläane Leit,
seh Mitarbeiter der AGF, seh' vun unsrer Stadt de Chef,
ich seh die Ortsvorsteherin Heike Firsching-Haselmeier,
ich seh Frau Müller und Herrn Meier,
seh Männer vunn de Feierwehr, seh Jäger ohne Schießgewehr.
Ich seh Arme, Reiche, Grumbeerbauern,
seh Kampftrinker die uff's Freibier lauern.
Ich seh Angler an den Tischen, die öfters mool im trübe fischen,
ich seh Gsunde und aach Kranke, die neue Kraft im Zelt hier tanke.
Und wenn's hinne juckt unn vorne beißt, nimmt man Klosterfrau
Melisengeist, doch helfen dir nicht diese Troppe,
hilft nur noch en gute Kerweschoppe.

Und endlich wieder in diesem Jahr, haben wir ein jüngstes Ehepaar.
Wir grüßen daher besonders in diesem Bau,
Herr Lukas Hudel und Irina, seine liebe Frau.

Wir freuen uns rießig unn dass iss ganz klar
unn höret mir zu, was ich eich zwo jetzt saa.
Für euch hab ich mein Verstand gelichtet
und folgendes wie in alten Zeiten gedichtet:

Zum Hochzeitstage allerwegen, erfleh' ich für euch Gottes Segen!
Er glätte eure Lebensbahn und bringt euch Schritt für Schritt voran.
Zum Ziel zum Glück der Zweisamkeit, in Eintracht und in Einigkeit.
Ich kann nichts besseres Euch sagen, als das in allen Lebenslagen,
Beständigkeit euch sei beschieden, in Innigkeit und Seelenfrieden.
Was vor euch liegt soll wohlgelingen,
soll Glück euch und Erfüllung bringen, auf das ihr-
die ihr euch vermählt- empfindet ihr habt gut gewählt.

Ich bitte Sie jetzt alle hier - aufzustehen und mit mir,
die Gläser in die Hand zu nehmen,
zum Flomersheimer Hochzeits- Kerwesegen...!

„Das unser jüngstes Hochzeitspaar, glücklich lebe Jahr um Jahr,
dass es zueinanderstrebe, dass in Harmonie es lebe,
dass es ohne Not und Sorgen, froh erwache jeden morgen.
Dass es Tag für Tag sich freue, auf das Gute und das Neue!
Dass des Lebens Wandel bringt,
dass ihm hold das Schicksal winkt.
Darauf heben wir alle das Glas zum Toast:
Das junge Paar, es lebe! Prost!“

Danke lieue Kerwegäste, ihr könnt euch alle wieder setze.

Die AGF, ach wie klor, besteht dieses Jahr seit dreißig Jahr .
Und - so hammer uns gedacht,
es wird auf dem Kerweplatz e Familiefescht gemacht.
An einem Sonntag Ende Mai,
so war es im historischen Wetterbericht zu lese,
wär fast immer schön Wetter gewese.
Vier Monat lang ham mir geplant, alles bestellt und alles bezahlt. Alle
waren engagiert, damit die AGF sich net blamiert
und dann, ich kann es jetzt noch net fasse,
hots de Petrus regne lasse.
Wir hawwen dann, dess werdd ihr all' wisse,
die ganz Feier leider absage müsse.
Dafür entschuldige ich mich und sag jetzt ganz leise

de gute Wille war do -
nur es Wetter war ... schlecht.

Zum vierten Mal in Folge, es iss kaum
zum fasse,
hot's unser Grundschul' wieder krache
lasse.

Nach dem Motto „Runter vumm Sofa
und ran an den Sport“,
setzte man beim Sportabzeichen die
Erfolgsserie fort.

In der Gruppe der Schulen von 150-
300 Kinner ,
war unser Grundschul' der große
Gewinner.

Das verdanken wir, weil Training im Sommer und Winter,
dem Lehrer Peter Benzmüller und dem Pensions-Lehrer Günter.
Und eins versprech' ich, so wahr ich hier steh,
wenn ihr nächstes Jahr wieder gewinnt,
gibt's 200.- Euro von de AG.
Unn jetzt gibt es, ich sags grad heraus, für die Sportabzeichen-
Gewinner von euch ein Applaus.

So enn Kerweumzug macht Arbeit, dess kann ich eich saa,
denn dieses Jahr war der Chef-Organisator nicht da.
Unser Rolf Müller, die gute Seele der AG, liegt in der Klinik,
dess dut uns all weh.

Doch eens muss man im lasse, ihr Leit,
er hatte schon alles vorbereitet.
Selbst aus de Intensivstation ließ er mich wisse,
dass wir sei Planungen umsetze müsse.
So hawwen wirs dann aach gemacht und ich denk mol,
es hot aach alles geklappt.

Danke Rolf, so ruf ich von hier,
wir alle wünschen gute Besserung dir. Wir hoffen alle,
dass deine Genesung jetzt fortschreitend ist
und du bald widder in unserer Mitte bist.

Und wenn du jetzt von den Gästen hörst den Applaus, verlässt du 4



sicher auch bald das Krankenhaus.

Oft liest merr in de Zeitung, eventuell aach zu Recht,
die medizinisch Versorgung uff emm Land
wär in Deitschland sehr schlecht.

Doch in Flomerschumm hawwen mir dahingehend gut lache,
hier tun gleich zwo Hausärzter ihren Dienst an de Vorortler mache.
Die zwää Dokter stehn im Stress, des muss merr halt wisse,
weil se jedes Ferzje behandele müsse.

Von mir werden hier jetzt zwei Geschichten berichtet,
doch es iss alles net wohr, es iss alles gedichtet:

In Flomerschumm beim alte Lenz, der iss fast siebzig alt,
haperts leicht mit de Potenz - doch sowas lässt ihn kalt.

Im Gegensatz zu seiner Fraa, die macht sich do was draus, -
sie geht prompt am nächscte Daa, zum Lange Michel naus.
De Doktor macht net viel Gedääns, er hot bloß ebbes g'saat,
moi liebe Fraa do gibt's bloß ääns, Honig, Honig jeden Daa.

So machtses dann, die dabbisch Fraa, macht Honig in soin Tee,
in die Plunz unn uff de Käs, in's Kraut unn ins Püree.

Noch ääner Woch' es war nix bassiert, do geht's se widder hie,
sie hot de Doktor konsultiert und mäant, dess klappt wohl nie!

Fascht genau wie's vorher war, Fehlanzeig im Bett,
kräftisch brumme dut er zwar, doch steche dut er net!



Unn Richtung Frangedahl do draus, hot de Dr. Weiß sei Haus.

Bei dem war eine Tags enn Flomerschummer Mann und klagte ihm
sein Leid sodann:

Herr Dogder, ich hab dehäm e beesi Fraa,

die dut mich ab und zu verschlaa,

unn zwää Zentner wiegt des alt Gesteck unn es iss e ekelhafti Zeck.

Guck derr moi blaue Flecke mal an, so behandelt merr doch kein
Ehemann.

Gewwen se mer mol enn gute Tipp, so von Mann zu Mann, wie ich
mich besser durchsetze kann.

Ei saagt de Werner, mein liewer Mann,

du moscht aach mol kreische unn ihr die Zäh mol richtig zeische. Mit
diesem Tipp und ziemlich froh, iss der Patient dann abgezoh.

Vierzehn Tag später, so Moins um halb acht, hot die Polizei den Mann

widder in soi Praxis gebracht. Ramponiert im Gesicht und seelisch ganz unne, hot enn die Polizei weinend vor de Hausdeer gefunne.

De Doktor schaut dem Mann in's Gesicht,
ei Karl wer hot dich dann so zugericht?

Mein liewer Doktor, dess kann ich derr saa,
dess war dehäm moi liewi Fraa.

Ich habb - wie empfohle - ihr die Zäh gezeigt -
ich war so frei >>>

jetzt guck merr in die Gosch, jetzt fehle merr
drei!



Schluss:

Unn wieder iss es mal soweit,
genug gebabbelt hier unn heit.

Eure Gesichter sprechen Bände,
wann iss der mit seiner Rede bloß am Ende.

Drum komm ich langsam jetzt zum Schluss,
weil ich mal wieder enden muss, mit meinen Reden und Zitaten und
auch das Freibier tut schon warten.

Danke sag ich allen die hierher gekommen,
an die, die am Umzug teilgenommen,
danke an unser jüngstes Ehepaar,
also an Lukas unn die Irina, sei Fraa.

Danke Miß Strohhut für ihre Zeit
und danke Herr Wieder, dass se kumme sinn heit.

Danke an Tennisclub, den Gastgeber hier,
danke an die Küche und die Männer am Bier.

Tschüss, haltet Euch munter, seid immer gut drauf,
im nächsten Jahr steh'n wir hier wieder auf.

Und ist das Leben manchmal trübe, immer hoch die Gellerübe.

Die vier Kerwe-Tage gehen schnell vorbei,

Ich hoffe, ihr seit oft dabei.

Und ich würde mich freue,
wenn ich euch nächstes Johr hier all' widder seh,
das wünscht sich de Kerweborsch vun de AG.

Dankschää!!

Rainer Hannemann, 28. August 2010



In ´re groe Zigarrekischt mit emm Bildsche vorne druff
vunn de erschte Sorrd "Havanna", heb isch all moi Kneppscher uff.
Duht merr mool e Glad vernnre, werren neije Knepp gerischt
unn die alde leggt merr sauwer in die "Knopp-Zigarrekischt".
Alde Reck, verwachsene Leibscher, alles was zu korz unn knapp,
schdobbt merr grn dann zu de Lumbe -
blo die Knepp, die schneid merr ab.
Was sich do in all de Johre langsam zommehufe duht,
iss e Raridadesammlung, ess e wahrie Wunnerdutt.
Hock isch dann als vorm moim Kischdl, weil isch grad e Kneppsche such,
mn isch immer, isch deht blttre wie imme Familiebuch.
Do sinn Kneppscher vunn de Mudder, vunn ehrr Staatsklad, wunderbar.
Wann se owends im Theader odder uffem Balsche war.
Seh isch do die schwarze Knepp - vumme Frack de ledschde Rescht -
seh isch grad moin Vadder danze, uff ´me groe schne Fescht.
Vunn de alde, reiche Dande schdammen Kneppscher aus Paris,
mit ´me Perlsche in de Midde, wie es dort so Mode iss.
Hosseknepp vunn unsre Buuwe, weie Kneppscher vunn de Scherz,
ach, unn do vumm erschde Dirndl, noch e Kneppsche wie e Herz.
Schne blanke Messingtaler hott de Klnnscht vunn uns gewollt.
Schdolz seh isch ihn noch marschiere, denn er mnt, die weer ´n aus
Gold.
Guck, mit denn weie Perlscher knepp isch meer moi Bliesel zu,
in dem Bliesel war isch gligglisch bei moim erschde Randewu.
Hunnert Sorrde Kneppscher hawwisch unn e jedes hot soi Gsischt.
Drumm kann isch misch nit drenne, vunn de ald Zigarrekischt.

Erinnerunge aus de "schleschde Zeit" vumm Dr. Bodo Schmidbauer

Die Rohrschdägge vumm Feldschitz:

Die alde Ur-Oiwohner vunn Flomerschumm kennen sicher noch de friehere "Dorfschandarm", de Feldschitz Bauer. Immer war er im Dorf unn im Feld unnerwegs mit soim Fahrrad unn uff de Such nooch uns Kafruuse. Er hott uns - unn meer hänn ihm kää Ruh gelosst. Dort wu am Fahrrad die Klemm ferr die Luftbumb iss, do war beim Schitz enn Rohrschdegge. Iwweraal wu er soi Fahrrad hiegschdelit hott - oft vorm Gemäänehaus am große Denkmal - iss der Schdegge vunn uns Banggert abmondiert worre. Jedio Woch hodder sich 3-4 Schdegge noochschneide misse. Wann er uns bei're Schdrooftat verwischt hott, hämmer unser Fäng griggt. Emool hott ähner vunn uns ihn abgelenkt: "Herr Schitz, net so fescht schlaache, isch hab heit kää Unnerhosse a. So Ausredde hänn awwer beim alde Feldschitz nix genitzt.

Verschberklau - längscht verjährt

So glei noochem 2. Weldkriech hänn fascht alle Leit Kohldamp gschoowe. Uns Buwe hott de Maage meischdens an de Kniekehle ghangge. Awwer 4-5 junge Kerl vunn de Ownergass hänn uns zu helfe gewisst:

Wann die Baure domools mit ehre Daachlehner uff's Feld gfare sinn, hott's meischt norre Kaffee unn Ladwerch- odder Sirubbrood gewwe. Awwer wann enn Bauer allää gezaggert hot, waren im Henkelkerbsche Woi, Worscht unn Brood. Wie merr dess ausaldowert ghatt hänn, war ferr uns glar, wie merr die Lescher in unsre Mäage schließe känden: Hot de Bauer die Forscht nuff gezaggert, hämmer uns ogschlische, ebbes vunn de Worscht unn vumm Brot abschnidde unn sinn dabber abghaue. Niemoools hänn meer viel mitgenomme, dann weer dess schnell uffgfalle.



Annem schääne Daag iss uns zu Ohre kumme, dass enn Flomerschummer Bauer sisch lauthals bei soiner Fraa beschwert hott, dass soi Veschber immer klänner werred. Aus Angscht, verwischt zu werre, simmer vorsichdischer worre unn hänn unser Fahrradduure mit dem Veschberklau in e anneres Revier verlegt.

Moin Schdallhaas:

Vor sechzisch-siebzisch Johr - also in de schleschde Noochgriechszeit - hänn viel Leit Schdallhaase gezooge, weil dess Flääsch vunn denne Viecher domools nit meldepflichdisch unn nit kondingendiert war.

Aach die Großeldere vunn moim Freund Gobberle, die alde Brenners, hänn enn Schdall voll Haase ghatt. Middags nooch de Schuul bin isch oft dem Gobberle Fudder hole gange, meischt uff de alde Schbortplatz an de Falderschdrooß. Do wu heit die Wilhelm-Mayer-Schdrooß iss, war frieher die Flomerschummer Fußball-Arena.



Demm Gobberle soim Großvadder hott merr domools enn Schdallhaas gschenkt. Enn Haasekaschde war schnell zusammengeaggelt unn in 3-4 Monat iss aus dem glääne Kerlsche so enn Mordsschlaggel worre, dasser fascht nimmie in den Kaschde gebasst hott.

Amme schääne Daag hab isch gheert, wie moim Vadder zu moiner Mudder gsaat hott: "Der Kerl iss jetzt fett genug, denn kännemerr ferr de Sunndaag schlachte".

Isch - ganz arisch verschrogge - nix wie nunner an de Haasekaschde, den Haas rausholt unn ihn schnell widder in de Schdall zum Brenner Großvadder gebrocht.

Was aus dem Haas worre iss???

Irigenwann isser doch in ´re Pann odder im Haasehimmel gelandt.

BOSCH

...unn weil´s so schää war, noch e Zugab vumm Herr "Bosch": Enn Unkel, der e Gudsel im Hossesack hott, iss bei de Kinner beliebter als e Tande, die norre Klawier schiebt.

Rädseluffleesung aus Nr. 19

Do kämmer uns jetzt ganz faul zurigglähne unn die Antwort unsere Lääser iwwerlosse:

Jetzt hab isch misch mool uffgerafft,
dess Rädsels Leesung iss geschafft:
"DE KRUG GEHT SOLANG ZUM MUND, BIS MERR BRISCHT"
Dess iss jo fascht wie e Gedicht.
... gerädselt hab isch immer, aach wann ´s verzwiggt,
awwer leider niemols abgeschiggt.
Unn do dess Heftel iss so gloor,
isch lees es jetzt schunn viele Jahr ...
Gruß - Anne-Marie Bachert aus Flomerschumm

odder:

... dess 19. Gebabelheft hot uns widder viel Schbass gebrocht. E großes Lob an alle Beteilichde ferr ehrn Oisatz, damit die Pälzer Schbrooch in Flomerschumm nit ausschderbd.
"DER KRUG GEHT... (..... siehe oben - Red.)
Beim Chruschtschow hab isch vorsichtshalwer ins Lexikon gugge misse, der war merr nit geheier (wemm sagen Se dess - Red.)!
Ihr liewe Leit, pälzisch zu schreiwe iss garnet so äfach. Drum loss isch dess jetzt ach bleiwe, sunschd lachener Eisch noch kabutt, iwwer moi dabbische Druxsfehler. Moi Korregdurprogram im Combjuuder hott ach schunn de Geischt uffgewwe unn meer die rod Kaad gezeigt.
Viel Griebß - Gabi und Manfred Gallus aus Flomerschumm

Jetzt noch die Gewinne unn die Breisschbender:

1. Breis: Ursel Lutz - enn Dischgrill - Edeka-Scholz
2. Breis: Iris Fischer - enn Guudschoi beim TuS - AGF
3. Breis: Eva Fischer - 2 Fläschelscherr Gribbelwasser - Edeka-Scholz

Na dann Brost !!!

Ah im leedschde Heft gibt ´s e Rädsel
unn ah widder 3 schääne Breise zu gewinne.

Wass verschdeht enn
Flomerschummer unner:


G e m ä ä

A: Rasenschnitt

B: Artikulation einer Ziege

C: Ortsverwaltung

D: Abk.: Gemeinschaft ästhetischer Ärzte



Denn Leesungsbuschdaawe bidde uff e Käädsche schreiwe unn bei ´s
Ruppe in de Jahnstr. 32d bis Ende Juni oischmeiße.
Absender nit vergesse??? Viel Gligg!!!



´s Nachthäwwelsche

Als isch noch e glää Kind war, hab isch
abunnzu bei moim Babba schloofe dirfe.

Dasses Nachts schnell gonge iss, wanns
gedriggt hott, isses Nachthäwwelsche mit in
die Schloofschdubb genumme worre.

Moin Vadder hott uff ähm Ohr schlescht
geheert unn uff ´s guude Ohr hodder sich
druffgeleggt.

"Babba, derf isch bei deer schloofe?"

"Klar Schatz, geh weil noi, isch kumm glei."

Meer hänn noch e bissel verzeht unn dann
hot sisch de Babba uff ´s guude Ohr gelegt
zum Schloofe. Uff ämool iss merr ´s Häwwelsche oigfalle.

"Babba, isses Häwwel hinn?", hab isch gfroogt. Verschdanne hodder
awwer wahrschoinlich: "Babba, ´s iss so hell do hinn".

"Dess isses Lischt vunn de Laddärn.", kummt als Antwort vunn moim Babba.

"Nä, isch män - isses Häwwel hinn?"

"Isch sag doch, dess isses Lischt vunn de Laddärn vorm Fenschder."

... unn so iss dess e paar Mool hie- unn hergange, bis moi Mama offange hott zu
lache. Do hot sisch de Babba rumgeleggt unn gfroogt, was los iss.

Meer sinn erscht ganz schbeet oigschloofe, weil immer widder jemand Anneres
lache gemisst hot. Noch Johre dennoh hämmer Gelächter geernt, wammer des
Schdiggel verzeht hänn.

Iris Adam aus Kibo



Midde ausem pälzer Lääwe

Also ich les jo a als Eppstänerin des Heft "Flomerschummer Gebabbel" besonders gern. Merr hot e bissel zu due, bis merr alles vun dem pälzische Dialekt rischdisch iwwersetzt hot, awwer dann is immer großes Schmunzle ogsaat, wie a beim letschde Heft Nummer 19. Do hab ich merr gedenkt, ich kennt jo a mol so e Gschichdel bei de Redagzion vun dem Hefdel abgewwe, was ich jetzt mache will.

Als jungie Verkäuferin imme Elektroschäft in Frankdedahl (dess war vor zirga 30 Johr) hab ich amme Moje mool en Mann bedient. Höflich, wie ich war un bin, hab ich gfroogt "konn ich ihne helfe?" Dodruff der Kunde: "Ich will Dutte ferr moin Klopfsauger". Do hab ich denn Mann ganz sachkundisch gfroogt: "Hän se de Sack vorne odder hinne?" Der Mann zögert en Moment, fang o zu grinse und seschd: "Heit moje war er noch vorne". Erschd do iss merr bewusst worre, was ich denn aame Kerl gfroogt hab und bin schamrot hinner de Theek verschwunnde. Dodezu muss merr awwer wisse, dass es bei de Klopfsauger zwä Modelle gewwe hot: Die äne hän de Staabbeidel vorne ghat, die annere hinne. Awwer bei meer war de Staabbeidel halt en Sack. So kann's äner Verkäuferin gehe, wann se pälzisch babbelt.

Un dann hot's noch en Fall gewwe in moiner Lehrzeit in demm Elektroschäft, wu ich a im Büro un net nur im Laade oigsetzt war. Un do hab ich am Telefon nadierlich hochdeitsch babbelt solle. Aller, ich hab mich dann bemieht, obwohl ich jo e wascheschdi Pälzern bin. Also, es klingelt und ich nemm de Hörer ab. Wie ich's gelernt hab, hab ich gsaat "Guten Tag. Sie haben ein Problem?" De Kunde meld sich und seschd "Ja, meine Waschmaschine hat keine Funktion mehr". Dodruff ich: "Ja, ist in Ordnung. Ich werde es sofort notieren, dass ehr Weschmaschien kabutt iss". Seitdemm hab ich nimmi versucht, hochdeitsch zu babbelt und trotzdem hänn mich alle Kunde verstanne.



Demm isses egal
wu de Sack hängt



Die Weschmaschien hott halt immer funktioniert

Die erscht Erinnerung

Die Fraa Prof. Sokop hott uns ehr erschdie Erinnerung an Frankedahl zugschiggt: Die Oiweiung vunn de 12-Aposchdel-Kärsch am 16.3.1952. Dess iss ganz erschdaunlich, weil se domools noch so enn winzisch glääne Schdebbses vunn 2 1/4 Johr war. Mit so'me Gedächtnis war's jo wohl schunn vor-programmiert, dass schbeeder mool e Proffessorin werred.

"Wie se nooch de Rebaraduur die Kersch widder oigeweiht ham, hot mer uff de Turm nuff derfe unn moi Eldere sin jo iwverall nuff, wo mer hot nunnergugge känne. Die Große ham jo iwver die Brüschdung driwwer geguggt - awwer isch kläänie Grott hab durch die Booge gugge misse un die hänn so ausgese, als deet mer glei unne durschrutsche. Also hab isch misch hinne on die Wond gedriggt un hab gebrillt wie am Schbiess. Des waa denne vielleischt peinlich! Die Leit ham all geguggt - un des ham moi Eltre iwverhaupt nit verdraage känne! Ich wollt nit ään Schritt vor odder zurigg gehe. Do gibts zwar kä Bild devunn un verzehl hammes mer aa nit, awwer isch wees noch genau wie dess waa. Als dann Vorgsjohr bei Ebay die Feschdschrift vunn domools verschdeigert worre iss, hawwisch glei widder gewisst, dass des moi friieschdi Erinnerung an Frankedahl iss."
Schääne Gries vum Brigiddelsche aus Wien



Wie hott seller Soldat gemäänt, wie ´rer nooch 2 Woche Hoimaturlaub bei soim zänkische Hausdrache widder an die Front kumme iss:

"Im Grieg hott mer halt doch soim Friede!!!".

"Heer mool Kall, so ganz im Verdraue - so vunn Mann zu Mann: Hoscht du schunnemool Viagra genumme?"

"Nä, nä, auswärts brauch isch sowas nit unn ferr dehääm iss merr´s zu deijer".

E paar alde Redensarte:

Wie mer se zieht, so hott mer se / Du kannscht mer mool die Gäns penne / Guude Abbedidd, nix verschlabbet, nix verschidd.

Walter Rupp

DER SONNTAGS-BRUNSCH



Moin Mann hott kerzlich zu merr gsaat: "Meer missen ubedingt emool zu ´me Brunsch gehe!"

"Isch will knn Brunsch", hab isch gsaat, "unn auberdem was isch garnit was dess iss!".

Er hott gsaat: "Wer heitzudaag noch net beim Brunsch war, der iss fach nit INN".

"Wann dess so iss", hab isch dann gsaat, "dann werd fach mool hiegange --- weil --- INN will isch jo schunn soi".

Isch hab im Lexigoon noochgeguggt, was so enn Brunsch iwverhaupt soi soll. Dess iss englisch unn drum sescht merr Bransch dezu, awwer schreiwe duud merr ´s "Brunsch".

Des Tunwort dezu hbt bransche unn schreiwe duud merr ´s brunsche. Dodebei hannelt es sich um e Mischung aus Frieschdigg unn Middagesse.

Dess kann ebbes werre, hab isch meer gedenkt - wahrschoinlich e paar alde Weck mit Marmelaad unn Schnitzel, wu vor Fett dropsen.

Meer sinn dann halt mit unsere 2 Kinner zum Bransche gange !!!

Glei am Oigang de erschte Schock:

Do muschde bezahle, bevor du iwverhaupt ogfange hoscht.

18 Euros pauschal ferr jeden Erwachsene unn ferr die Kinner zeh Cent ferr jeden Zendimeter Kerbergreeß. Dodefor soll´s Esse, Kaffee unn Tee nooch Beliewe ubegrenzt gäwwe.

Also dess geht jo guud los! 36 € ferr misch unn moin Mann, uhne dass isch wääß, wass isch dodefor grieh.


Die Kinner hänn´se gemesse, dass gewisst hänn, wasse verlange missen. Unn was macht unser Herr Sohn? Ansdatt dass sisch duggt unn uns e bissel beim Schbare hilft, schdreggt der sisch wie e Giraff, weil er schdolz iss, dass er mit seine siwwe Johr schunn so groß iss. Vunn unsere Dochder will isch garnix sage, die iss elf Johr alt unn hott so moderne Schuh oghatt mit ganz hohe Absätz. Bei derer hänn die Schuh allä schunn enn Euro unn siewezisch gekoscht.

"S´negschte Mool kummscht du mit Sandale - falls merr iwverhaupt nochemool branschen" hab isch zu dere gsaat - "dass dess wääscht!"

"Unn wann Schnee liggt?", hott se gfroogt - "Dann kummscht barfießisch, dass die Sandale nit nass werren".

Dann simmer endlich noi in de Schbeisesaal. Isch hab gedenkt, misch drifft de Schlag! Do war e Büffee uffgebaut - soooo ebbes Großes hab isch in moim ganze Läwe noch nit gsehe. Ehr Leit, de totale Wahnsinn:

Hummer, Lax, Schrimps, Kaviar - awwer nadierlich a guude Sache wie Saumage, warme Läwwerkees unn Hinkelschleggel. Alle Sorrde Salaade waren do unn jede Menge Obscht. Unn dann noch enn Haufe waames Zeisch, wie Lasannje, Gordnblöö, Schweinebroode, Kneedel, Pommfritz unn Nuudle.



Unn die Noochschbeise: Schoggocrääm, Eis

unn enn Haufe annre Sießgram, wu isch iwverhaupt nit gekännt hab.

Unn Kees in Masse, weil der jo - wie merr wääß - de Maage schließt.

Ja wann dess so iss, hab isch merr gedenkt, dann iss dess wass Anneres - die 18 Euro verfress isch locker vumm Hocker unn die Zwäämeederfiereachzisch vunn de Kids notfalls ah noch.

Isch wollt glei mit´me große Deller an die Keschtlichkeide schdirme, awwer moin Mann hott gemähnt, dess hett känn Schdiel, wammer glei hierennt. Zuerscht misst merr sisch setze unn Ebbes zum Drinke beschdelle. Aller hopp, wanner mänt, dann mache merr´s halt so.

Moin Mann unn isch hänn uns enn Kaffee beschdellt - die Kinner

wollten awwer enn "kalde Kaffee", der naddierlich nit im Breis debei war. "Er saufen enn Tee", hab isch gsaat, "der koscht nix!!!

Awwer moi guud Schdiggg hott gsaat, die griehen ehrn kalde Kaffee. Na aller, hab isch gedenkt, jetzt kummt ´s a nimmi druff o, ´s iss merr grad worscht - isch hab jetzt Hunger.

Dann bin isch glei ans Büffee unn hab merr zuerscht mool e halb Pund Lax uff de Deller.

Abropoo Büffee: Do gibt ´s Leit, die sinn dermaße riggsichtslos unn fressen wie die Bleede - ja, die fressen denn deiere Lax weg, dasses e wahrie Kaddaschdroof iss - merr soll ´s nit glaawe. Unn drumm hab isch meer gedenkt, bevor so ähner kummt, du isch misch mool oschdännisch oidegge.

Zum Lax hab isch merr dann noch e Heringssalädsche mit roode Riewe dezu, weil dess farblisch rescht guud harmoniert. Dess blasse Rot vumm Lax unn dess gräftische Rot vumm Heringssalaad unn de Roodriewe - äfach schäh! Merr sagt jo, die Aage essen mit unn wanns grad nix extra koscht, känn die sisch jo ah mool satt esse.

E paar Dindefischring, sieß-sauer, wege dem Eiweiß .. unn dass ebbes Herzhaftes debei iss, hab isch owwedruff noch zwää Scheiwe roode Bressagg gelegt - unn drei Brezle.



Wie dess alles drunne war, hab isch merr enn große "Salaaddeller" zsammegerischt, wäge de Viddamiene unn so. Dodefor sinn die Salaade jo do.

Also hab isch meer e guudes Pund reinie Gsundheit uff moin Deller gepaggt: Nuudelsalaad mit Cräm-fräsch, Schweizer Worschtsalaad mit Kees, Eiersalaad, Flääschsalaad unn Keessalaad, extra pikant. Damit dess Ganze nit gar zu gsund werdd, noch e diggie Scheib Läwwerkees owwedruff.

Der war eigentlich rescht guud gewesst, der Salaaddeller unn do hääßt ´s immer, wass gsund iss, schmegg nit - so enn Bleedsinn.

Nooch soviel Gsundheit war merr ´s direkt widder nooch ebbes Herzhaftem zu Mut. 3 Hähnscheschenkel in Aschpik, e gläänes Pündsche gereischerde Aal unn 4 Schinkerellscher mit Schbarschle, weil Schbarschle jo sehr kaloriearm unn harndreiwend sinn. Unn dasses net gar so arg werdd, nochemool 3 Brezle.

Abropoo harndreiwend: Isch hab merr dann e Weissbier beschdellt, obwohl dess jo separat wass gekoscht hott. Awwer nooch vier

Tasse Kaffee braucht dann doch mool ebbes Gscheid, sunscht bringt ähm dess viele Koffeeiin de ganze Greislauf durschenanner. Unn außerdem, wann die Kinner den deire kalde Kaffee saufe dirfen, do werr isch doch als Mudder meer aach e Wääzebiersche genehmische dirfe! Odder net???

Nooch dem kiehle Bier unn denne kalde Schbargelrellscher hab isch merr gedenkt, dass ebbes Warmes zwischedursch nix schade käänt unn bin schnurschdraggs widder ans Büffee. Isch hab merr Lassanje genumme unn Pommfritz unn vorsichtshalwer noch e Gordnblö, weil bloß noch elfe do waren.

Dasses nit so exodisch werrd, hab isch schnell noch zwää Scheiwe Schweinsbroode druffgelegt unn zwää Kneedl dezu - die Kneedl hawwisch e bissel oischbreize misse, dass net vumm Deller rollen.

Wie isch dann mit moine Schätz grad vumm Büffee wegwohlt, dreff isch de Direkter vunn moiner Bank. Isch hab gemähnt, isch seh net rescht: Der hott uff soim Riesedeller ä ähnschie Scheib Meloon unn zwää winzische Scheibschincke druff ghatt - sunscht nix!!!

Isch hab zu moim Mann gsaat: "Kannsch der dess vorschdelle, der Kerl zahlt 18 Euros ferr e Schdiggel Meloon - als Bankdirekter! Do muss merr sisich jo mool genau iwwerlegge, ob merr so ´me Mensch iwwerhaupt soi Gschbaartes overdraue kann, der kann doch nit mit Geld umgehe, der schmeißt ´s jo ah schunn priwaad zum Fenschder naus".

Nooch de warme Schbeise war isch eigendlich schunn ziemlich satt, awwer die foine Deseers wollt isch uff jeden Fall noch browiere - schunn aus Brinziep, weil isch INN bin.

Isch hab merr e Mischung aus verschiedene Crääms zammegschdellt: Vanillecrääm, Nuss- unn Schoggocrääm - so knabb e Pindsche. Unn dasses mool widder nit zu arg werrd mit de ugsunde Sache, noch 6 Kiwies dezu.

Jetzt kummt de Hammer:

Grad wie isch vunn der Vanillecrääm uff Nusscrääm umschdeige wollt, iss merr ´s schlescht worre - wääß de Deiwel warum. Awwer dodriwwer will isch jetzt nit weider redde.

Schbeeder uffem Häämweg hab isch zu moim Mann gsaat:

"Ebbes hab isch heit beim Bransche gelernt: Der Bankdirekter iss garnit so dumm, wie isch meer dess oigebild hab".

Inge-Maria Pohl

(vermutlich noochem Heeresaaage uffgeschriwwe??? - Anm. d. Red.)

Jetzt kummt 3 mool was "Lutzisches"

A in de Schlabbe macht's Spaß!

Moi Mamme un de Babbe sin vor Johre freidags immer gärn mit Baschdelfraue vum Flomerschummer Bund Freundschaft esse gange. Des war sozusage Tradition, weil's immer luschiedlich war, viel Witz un Spaß gemacht worre is.



Un do hot's mol en Freidag gewwe, wu's die Mamme irgendwie vor de Abfahrt zum Freidagsowendesse eilisch ghat hot. Also: Korz ins Bad, in die Klamotte gschlubbt un Abfahrt mim Audo. No Lambsem in e Lokal sin se gfare. Wie die Mamme an de Trepp zum Lokal no unne guckt, sieht se, dass se die Hausschlabbe noch o hot. Sie un ehr befreundete Baschdelfraue hän sich halwer dot gelacht. Die hän bestimmt an dess Motto gedenkt: „Owwe hui, unne pfui“. Obwohl die Schlabbe jo ordentliche Schlabbe waren, zu de schicke Blus hän se net gebasst.

Awwer die Mamma hot mer verzeht: „'S war en scheene Owend, a mit de Schlabbe an de Fieß un die hän jo unnerm Disch gschdanne!“

Die superpünktlich Freundin

Ich hab e Freundin, die a fascht 40 Jahr moi Kollegin war und die in denne viele lange Johre niemols zu spät ins Büro kumme is, eher hot se e Stunn vorher schon am Schreibdisch ghockt. Immer pünktlich, immer e Frieuhuffstehern, so no dem Motto: „Der frühe Vogel fängt den Wurm“. Und recht hott se schon mit ehre Oistellung, dass Frieuhuffsteher länger was vum Daag hän, denn „Morgenstund' hat Gold im Mund“. Verschloofe, dess wär ferr die Heidi was Schreckliches gewesst.

Un so issre bassiert, dass se nachts uffschreckt, mit verschloofene Aage uff de Wecker guckt und denkt „ach Gott, ich hab verschloofe“. Mit zwä Bää isse ruck-zuck aus ehre Bett uffgeschbritzt, hot blitzschnell mit Schmackes de Rollade hochgezoge, dass faschd die Fetze gfloge wärn, ehr Deckbett un Kobbkisse zum Lüfde ans Fenschder gschmisse (dess hot se jeden Daag so gemacht und hott zu ehre Ordnung ghert), in de Morgemandel gschlubbt (ferr die Zeitung roizuhole) un dann schleunigst aus de Schloofstubb raus.

In de Kich guckt se uff ehr große Kicheuhr, guckt nochmol und traue ehre Aage net: 3 Uhr Mitte in de Nacht. „Ei was soll ich dann um 3 Uhr schon uff? Ich bin doch net bleed“ hot se gedenkt, is uffem Absatz rumgedreht, Morgemandel aus, Kobbkisse un Deckbett widder

noi un ganz leis un vorsichdisch de Rollade widder runner gemacht, dass die Mieter unnedro net määnen, sie wär verrickt. Und dann nochmol noigekuschelt ins frisch gelüfde, abgekühlde Bett bis dann endlich um 05.30 Uhr wirklich de Wecker geklingelt hot.

Meer Kolleginne hän uns halb dodgelacht, wie se dess verzeht hot!



Die änzisch Bobb

Korz no Kriegsende war's Geld jo iwverall knapp. Un nadierlich a bei uns. Als Mädche hab ich dann im Alder zwische 4 un 6 Johr e Bobb vun moiner Mamme gschenkt kriggt. Schä war die, mit eschde, braune, lange Hoor, blutrote Libbe un me ganz goldische Gsichdelsche. Moi Dande Kädche hot merr e paar Klääder ferr die Bobb geneeht, was war ich stolz. Moi Mamme hott merr immer ogeternt: „Losse nachts net drauß ligge, ,s kennt mol regne“. Also hab ich se immer schee roigholt iwver Nacht. Doch wie's halt so iss im Lewe, ämol hab ich's doch vergesse. Moi „Bärbel“ hott im Hof iwvernacht. Un in dere Nacht hott's gschitt wie mit Kiwwel. Am Moje is merr moi Bärbel oigfalle un ich bin nauserennt. Was ich do gsehe hab, dess hab ich bis heit noch net vergesse: Moi Bobb war uffgewäascht, ich glaab, dere ehrn Körper war aus Babbedeckel, kä Gsicht hott merr mäh gsehe, die blutrode Libbe waren verschwunde und nur noch des dolle, braune Hoor hot iwver die Mauer ghange. Träne iwver Träne hab ich gegrint un die Mamme hot gsaat: „Bass uff doi Sach besser uff, jetzt gibt's kä Bobb mä“. Un dann sinn noch mä Träne gflosse. Doch moi Dande Kädche die hot Mitleid mit meer ghat und e bissel meer Geld wie moi Mamme un die Dande hot merr an Woihnachde e neii Bobb gschenkt. Uff die hab ich besser uffgebasst. Mit dere hott moi eigeni Dochter noch gschbielt.

Eier Pressefraa die Ursula



kaemte / pixelio.de

Liewe Leser vum Gebabelheft!

Jetzt, wu dess gsaat worre is in die AGF, dass dess dess letschde Gebabel-Heft soi soll, ei do hab ich jo faschd groine misse. Schad, um dess scheene Hefdel, wu immer so viel Spaß beim Lese gemacht hot.

Awwer wie häßt's so schee: Alles hat ein Ende, nur die Wurst hat zwei !

Doch ich will a noch ämol was schreiwe. Die Kerweredd 2010 vum AGF-Vorsitzende Rainer Hannemann, deer, wu a unsem Kerweborsch in Flomerschum seit viele Johr is, die iss jo in demm letschde Hefdel a drin, awwer die Kerwebeerdichung vun 2010, die soll doch a noch veröffentlicht werre weil ich die so doll gfunne hab.

Unser drei Flomerschummer Vereine, wu de Feschdwirt an Kerwe machen, also de TuS, die Zwiwwelböck un de Tennisclub, die gewwen sich jo immer viel Mieh, de Leit a noch am letschde Daag nochemol so e Heileit zu biede. (Heileit: des werd so gschbroche, awwer eigentlich isses e englisches Wort un werd Highlight gschriwwe ach, merr kennt jo a Höhepunkt sage !)

Also, dess Heileit 2010, wu de Tennisclub unsem Feschdwirt war, dess war die Kerwebeerdichungs-Schau (uff hochdeitsch-englisch: Kerwebeerdigungs-Show) vum 31. Augusd. Do hot doch wirklich äner von de Ehreuvorsitzende vun dem Tennisclub, also de Dokder Henning Vogel (de anner Ehreuvorsitzende is de Udo Böhm) e rischdisches Drehbuch gschriwwe un sich selwer Texte un Kostüme oifalle losse do iss de Gäscht jo die Luft weggebliwwe.

Awwer de Henning, dess is kän Pälzer un deshalb hotter die geroimte Verse mit soiner sonore, ausdrucksstarke Stimm in hochdeitsch abfasst. Awwer wass der sich so zwische soine Verse ferr Gedanke gemacht hot, also sozusage dess Drehbuch, dess verrot ich Eich in pälzisch. Unn wanner beim Lese ganz mit Eire Gedanke debai seid, dann kennt ehr die Schau im Geischd mitverfolge. Un ehr wert wie ich feschschedelle: Deer Mann hot Fandasia!!! Los geht's! Punkt 22 Uhr am 31. Augusd 2010:

De Kerweborsch (der spielt Musik an soim Instrument im Feschdzelt) heert mitte im Musikstick pletzlich uff zu spiele, gleichzeitig geht im ganze Zelt dess Licht aus.

Gschbenschdische, erwaddungsvolle Dunkelheit. Es werrn 10 dumpfe, laute Gongschläg oigschbielt. Lichtblitze zucken iwwer die Biehn. Die Musik setzt oi mit dem Thema „Also sprach Zarathustra“ (Opus 30 vun Richard Strauss). Musik Ende.

Ufftritt vun Graf Drago im Vampirkoschdiem und weißer Gsichtschmink mit me große Netz, wu er iwwer de Schulter hinner sich herzieht. Drago hott e Gebiss mit Vampirzäh. Drago folgen zwee ähnlich koschdimierte Helfer (Thomas Müller unn Mitstreiter). Die Biehn werd in grelles Schoiwerferlicht getaucht.

Drago: Vor euch, ihr werten Herrn und Damien
steht Drago, Graf von Transsylvanien.
Muss eure Freude leider stören.
Warum? Das werdet ihr nun hören.

Vampire kummen an die Bühneramp im Schoiwerferkegel (Omerkung: Dess war flottes Jungvolk vun de Zwiwwelböck-Garde).

Drago (zeigt uff die Vampire):
Mir sind, das war nicht abgesprochen,
vier der Vampire ausgebrochen
in ihrem weißen Totenhemd,
der Särge Deckel aufgestemmt.
Zwei Stunden schon vor Mitternacht
sich tanzend auf den Weg gemacht,
mit toten hasserfüllten Augen
dem Kerweborsch das Blut absaugen.

Musik: Tanz der Vampire“ setzt oi, die Vampire klettern uff die Biehn und tanzen.

Drago: Den Herrschaftskampf mit den Vampiren,
will ich, Graf Drago, nicht verlieren.
Sie sollen nicht an's Ziel gelangen,
mit diesem Netz will ich sie fangen.

Graf Drago schwebt iwwer die Biehn, ‚s Netz iwwer soim Kopp schwingend un will die Vampire fange.
Die schluppen immer widder unner soim Netz durch.

Dann bewegen se sich uff de Kerweborsch zu un fletschen gierisch mit de Zäh.

Drago: Wie schaut der Kerweborsch so blass,
 in Augen und auch sonst wo nass,
 steht ihm, das ist nicht übertrieben,
 die Angst schon im Gesicht geschrieben.

Die Vampire sterzen mit me gellende Schrei uff de Kerweborsch zu un beißen ihm in de Hals.

Drago (rauft sich die Haare):
 Sie stürzen auf den wackren Borsch,
 der zittert, angstvoll, „dorsch und dorsch“,
 und bohren ihre scharfen Zähne
 ihm in Arterie und Vene.

De Kerweborsch bricht iwwer soim Instrument zusamme, fällt uff die Taschde, ‚s gibt en grässlich
schräge Ton un dort bleibt er ligge. Die Vampire lossen vunnem ab un bleiwen uf de Knie newer dem
Kerweborsch in Lauerschdellung.

Drago: Seht her ihr Freunde, Kerwezecher,
 der Kerweborsch wird schwach und schwächer,
 gebissen von den Vampirfratzen
 droht er vorzeitig abzukratzen.
 Das, Freunde, gilt es abzuwenden,
 die Kerwe soll jetzt noch nicht enden.
 Den Kerweborsch trotz Blut und Wunden
 wir brauchen ihn noch für zwei Stunden.

Drago verscheicht die Vampire mit re Handbewegung.

Drago: Macht fort, verschwindet, weg von hier.
 dies ist kein Ort für den Vampir.

Die Vampire verkriechen sich klälaut in geduckder Haldung. Uff de Biehn isses still. Aus de Ferne ertönt
drei- bis viermol e Martinshorn.

Drago: Die Sanitäter nahen schon
 mit neuem Blut zur Transfusion,
 von einer Jungfrau frisch gespendet,
 dass uns're Kerwe noch nicht endet.

Sanidäder stürmen uff die Biehn mit re Bahr un mit me Infusionsgalge. Die leggen de Kerweborsch uff
die Bahr, umwickeln soim Arm mimme Duch un befestischen dodebei unnerhalb vum Duch, ohne dass es
dess Publikum sieht, e zweddi offeni Flasch an soim Arm.

Drago: Erst heut' um Mitternacht fällt brav
 der Borsch ein Jahr in Dämmereschlaf.
 Drum tut jetzt rasche Hilfe Not:
 Um 10 Uhr ist die Kerb' nicht tot.

De Drago guckt die Vampirmädcher mit me stroofende Blick o.

Drago: Zu strafen diese Vampirsluder
 eilt schon herbei ein „grüner Bruder“
 als „Notfall-Arbeitsmediziner“
 und unser „Kerwe-Rettungsdiener“.

Mit soim weiße Kittel kummt de Dokder Gerhard Bruder, hot e Stethoskop un en
„Verlängerungsschlauch“ ferr die Ampull debai. De Bruder leggt dem Kerweborsch die Infusion o.
Dodebai verbind er denn „Verlängerungsschlauch“ mit de Ampull un de zwedde Flasch unnerm Arm vum
Kerweborsch. Die „Infusion“ werd gschdard, die rot Flüssigkeit fließt in die zwedd Flasch ab.

Drago (dankbar):

Wenn wir den „Bruder heut nicht hätten,
wär' unser Borsch nicht mehr zu retten.
Die Kerwe wär' dann jetzt schon aus
und leer das Zelt von Mann und Maus.
Zu retten unsere schöne Kerwe
verabreicht er die Blutkonserve,
die ihre Wirkung nicht verfehlt,
der Kerweborsch wird neu beseelt.

De Kerweborsch springt uff, schiddelt sich, macht e paar Kniebeuge und sterzt sich widder uff soi Kiebord.

Drago (mit großer Freude in der Stimme):

Springt von der Bahre trotz der Wunden
mit frischem Blut, doch nur zwei Stunden.

De Kerweborsch spielt vor lauder Frääd en Dusch (z.B. Halleluja odder was Ähnliches).

Drago: Um Mitternacht fällt der dann brav
für ein Jahr tief in Dämmer Schlaf.

De Kerweborsch steht uff, geht vum Kiebord wegg, guckt ins Publikum, zuckt frogend mit de Schuldre un kummt mit usichrem Gang uff de Drago zu.

Drago (besorgt, fragend):

Doch wenn er „todesähnlich“ ruht,
und ein Jahr sich hier nichts mehr tut,
ganz Flomersheim wär' starr vor Schrecken,
könn't man rechtzeitig ihn nicht wecken.

(Omerkung: Er is AGF-Vorsitzender !)

Er muss, will ihm Erweckung winken,
den „Auferstehungsschorle“ trinken,
die Flomersheimer Medizin
mit dem „Erweckungsvitamin“.
Dies Vitamin ist ganz was Rares.
Man kann es kaufen nicht durch Bares.
Es halten vielmehr zum Verdruss,
Politiker es im Verschluss.
Dies Vitamin Erfolg beschert,
wenn man ein ganzes Fläschchen leert.
Die Menge reicht, gesund, mit Lachen
wird man in einem Jahr erwachen.

Drago zeegert e Sekund, lacht dann verschmitzt un seschd:

Drago: Ich frag' die Ortsvorsteh'rin schlicht:

„Du hast das Zeug und brauchst es nicht?“

„Nein“ ist die Antwort, ganz korrekt:

„Ich brauch' es nicht, bin längst erweckt!“ (Omerkung: sie iss 2009 Ortsvorsteherin worre)

„Erst wollt ich nach Berlin es schicken,
Frau Merkel schon damit beglücken.

Doch wär's für „Angie“ gar nicht gut,
wenn sie noch ein Jahr länger ruht“.

Drum statt es nach Berlin zu senden,
will sie es heut' der Kerwe spenden,
denn Flomersheim kann ein Jahr warten,
und dann die nächste Kerwe starten.

Dann setzt die Musik oi: Der „Walkürenritt“ vum Richard Wagner werd korz (3 bis 5 Sekunde) ogschbielt.

Drago: Schon naht durch dieses Zelt's Türe
die Flomersheimer „Ortswalküre“

mit dem „Erweckungsvitamin“
für unsere Kerwe statt Berlin.

Die Ortsvorsteherin Heike Firsching-Haselmaier kommt mit Bruschedpanzer, Helm un Speer roigschdürmt un fuchdeld mit de Händ rum die Ortsfahn hot se debai.

De Drago babbelt se o, awwer im „wagnerianische“ Versmaß (alle Werder fangen mit demm gleiche Buchstaawe o).

Drago: Holde Heike, hehre Heldin,
 feiern friedlich Feste froh.
 Tolle Tropfen trägst tu tapfer,
 dafür dankt dir dein Dragó.

Die Ortsvorsteherin gibt em die klä Ampull mit de rode Flüssisckheit. Drago wend sich an de Kerweborsch un verkünd em soin nahe Kerwedood.

Drago: Der Kerweborsch Vampir-gebissen,
 weiß wohl, dass er wird sterben müssen.
 Trotz Jungfraublut, damit Ihr's wisst,
 hat noch zwei Stunden Gnadenfrist.

Graf Drago hebt die Ampull un geht an de Disch uff de Biehn. Gemeinsam mit soine Helfer machter dann en „Auferstehungsschorle“. Dess Glas zeigter dem Publikum un schütt dann noch dess „Erweckungsvitamin“ noi. Die Schorle färbt sich rot. De Drago hebt dess Schorleglas mit zwä Händ in die Höh zum Publikum un sescht zum Kerweborsch:

Drago: Eh' wir zum letzten Abschied winken,
 musst Du nur dieses Glas noch trinken
 mit „Auferstehungsschorle“ drin,
 so macht der „Kerwetod“ erst Sinn.

De Kerweborsch drinkt en feschde Schluck.

Drago: Die Zeit ist um Schlag Zwölfe hier.
 Der Schorle mit dem „Elixier“
 lässt nächstes Jahr dich auferstehen.
 Jetzt darfst du weiter spielen gehen.
 Graf Drago lässt dich traurig ziehn,
 die schöne Kerwe geht dahin.

De Kerweborsch geht ans Kiebord un spielt leis soi Abschiedslied „Macht euch haam, ihr Kinner, macht euch haam.....“

Drago singt: „Mir trollen „haam zu unsre Kinner“ dann im Nu,
 hat die Flomerschummer Kerwe widder Ruh.

Graf Drago un alle Helfer gehen traurisch vun de Biehn.

Drago: Mir trollen „haam zu unsere Kinnder“ ich und du
 denn die Flomerschummer Kerwe hot jetzt Ruh.
 Doch es gab hier nur Gewinner,
 ob Erwachsene, ob Kinner,
 kam auch Bombenstimmung gratis noch dazu.
 Tagelang nur Spaß und Freude
 schon seit Freitag und bis heute,
 doch jetzt hat die Kerwe bald ihr Ruh,
 Spaß und Freude gratis gab's dazu.

E N D E

So - dess war ´s.

Zum Schuss bedanke merr uns nochemool beim Herr Dreher, der uns die allermeischde Hefte ganz ferr "umme" gedruggt hott ...


... bei unsere Lääser, die dursch ehr viele Schbende die Druggkoschde ferr die ledschde Ausgaawe finanziert hänn ...

... bei de Schbonnsoore vunn unsere viele Rädselbreise, besonders bei de Fam. Scholz vumm Edeka-aktiv-Markt ...

... unn "laast batt nott liest", wie meer Pälzer sagen, dankschäh an all unser Schreiwere, Dichter unn Denker ferr die Gschichtelscher, Gedichte, Beidräg unn uffmundernde Lääserbriefe.

Die Arbeitsgemoinchaft vunn Flomerschumm - AGF

... unn wann ´s ah kä Gebabbelheft mä gibt,
Flomerschumm bleibt doch de Mittelpunkt vunn de Welt !!!



Imbressum:

Idee/Gschdaltung/Illuschraktion/Rädsel: Walter Rupp

Redagzion: AGF-Arweitskreis "Flomerschummer Gebabbel"

Druck: Fa. Erdelmeier - Medienagentur. Druck. Verlag - Worms

Drukksfehler sinn beabsichdischt unn exdra zur Unnerhaltung oigebaut.

Wer ähner findt, der derfen behalde.

Flomerschumm im Mai 2011